

Powšitkowne WOZJEWJENJA

njedźelu, 2. nowembra 2025

Modlenje w Róžeńće

Na modlenje różowca a před Najswjećišim su wěriwi sobotu, 8. nowembra, we 18.00 hodź. do Róžeńčanskeje hnadowneje cyrkwy přeprošeni. Pačerje budu w serbskej a němskej řeči spěwane.

Modlenje při kopolaku

Na modlenje swjateho różowca při kopolaku za Hanku Šercec a na wopominanje wšěch přescěhanych su zajimcy njedźelu, 9. nowembra, do Hórkow přeprošeni. Započatk je w 17.00 hodź. při Elic statoku na Chróšćanskej 17.

TCM prosy na škot a rommé

Sekcija Swójba Towarstwa Cyrila a Metoda z.t. (TCM) přeprošuje wšitkich zajimcow na škotowy turněr, kotryž wuhotuje wona wutoru, 18. nowembra, na předwječoru pokutneho dnja, we 18.30 hodź. w Jasčanskej „Bjesadže“. Wuraznje su nimo muži tež žony přeprošene, wšojedne kotreje staroby. Za tych, kotřiž njemóža škot hrać, zarjaduja zdobom turněr z kartowej hru rommé. Myta ma TCM za dobyčerjow wobeju turněrow spřihotowane. Wobdźělenje je za wšitkich darmotne. Wo zastaranje z jědžu a napojemi so TCM postara.

Nazymska akcija „Łužica pomha“

Towarstwo Cyrila a Metoda z.t. (TCM) chce tež lětsa ze swojej nazymskej akciju „Łužica pomha“ diecezanskemu zwjazkej Carity w pólskim Ełku zaso pomhać. Tam wjesela so nade wšěm, štož w swójbje trjebaš, kaž su to drasta, črije, artikle hygieny a kosmetika za žony a wosebje za dźěći, ale tež płokanski próšk, kuchinske graty abo pampersy za dźěći runje tak kaž za dorosćenych. Slódkosće měli separatnje spakować. Wotedać hodža so dary – po móžnosći w měchach – scěhowace dny pola Špitankec w Zejicach, Kamjenska dróha 10: sobotu, 8. nowembra, wot 9.00 do 12.00 hodź., pjatk, 14. nowembra, wot 15.00 do 18.00 hodź kaž tež sobotu, 15. nowembra, wot 9.00 do 11.00 hodź. Štóž chcył akciju z pjenježnym darom podpěrać, njech přepokaza swój dar na konto Towarstwa Cyrila a Metoda z.t. (TCM): Cyrill-Methodius-Verein e.V., IBAN DE65 7509 0300 0008 2823 66, hesło: „Caritas“. Za dary hač do 300 eurow dosaha za financny zarjad mjeztym jako dopokaz kontowy wučah. Za wyše sumy wustaji TCM darowansku kwitowanku, trjeba pak dospołnu adresu, kotruž měli pak z mailku na TCM@Posol.de abo telefonisce pod (0 35 91) 55 02 10 zdźělić.

Taizéske modlenje

Dwurěčne modlenje po Taizéskim wašnju a z meditatiwnymi pěsnjeni budže wutoru, 4. nowembra, w 19.30 hodź. w Lutherowym domje ewangelsko-lutherskeje wosady swjateho Pětra w Budyšinje, Hošic hasa 28. Wšitcy zajimcy su wutrobnje přeprošeni.

Putnikowanie wobornikow w Čěskej

Čěska katolska wosada Horní Roveň a Zwjazk swjateho Floriana Čěskeje republiki přeprašujetej wobornikow a wšitkich dalších zajimcow, tež serbskich, na nazymske putnikowanie k česći swjateho Floriana. Hłowny celebrant swjatočneje Božej mše sobotu, 8. nowembra, w 10.00 hodź. w cyrkwi w Horní Rovni budže Legničanski biskop Andrzej Siemieniewski z Pólskeje. Tež dalši duchowni su přeprašeni, kemše jako koncelebranća sobu swjećić. Nawodnistwo wobornikow prosy wo mjena a službny rjad serbskich wobornikow, kotřiž na putnikowanie přijědu, zo by zetkanje bóle wosobinski raz měło.

Smochčanske jewiščo

W srjedźišću přichodneho zarjadowanja w rjedže Smochčanskeho jewišća steji moler Edvard Munch (1863–1944). Jeho předstaji referentka Marianne Risch-Stolz sobotu, 8. nowembra, w 19.30 hodź. w tamnišim kubłanišću swjateho Bena. Zastupne lisćiki za dźesać eurow dóstanu zajimcy při wječornej kasy.

Literarna kofejownja

Poslednja lětuša literarna kofejownja Budyskeho ekumeniskeho tachantskeho wobchoda budže srjedu, 12. nowembra, w 19.00 hodź. Na njej čita wučerka a awtorka Ivonne Hübner ze swojeje knihi „Aus Salz und Asche“, w kotrejž zapołoža lubosćinsku stawiznu do wjetšeho historiskeho konteksta a zaběra so z často njeznatymi dźělowymi wuměnjemi w škleńčernjach. Zastup je darmotny, wo dary proša.